



**ХУУЛЬ ЗҮЙ, ДОТООД
ХЭРГИЙН ЯАМ**

**“ЦАГДААГИЙН БАЙГУУЛЛАГЫН ХАМТЫН АЖИЛЛАГААНЫ ТУХАЙ
МОНГОЛ УЛС БОЛОН БҮГД НАЙРАМДАХ ЧЕХ УЛС ХООРОНДЫН
ХЭЛЭЛЦЭЭР”-ИЙГ СОЁРХОН БАТЛАХ ТУХАЙ ХУУЛИЙН ТӨСЛИЙН
ҮР НӨЛӨӨНИЙ ҮНЭЛГЭЭ**

СУДАЛГААНЫ ТАЙЛАН

Улаанбаатар хот

2025 он

**“ЦАГДААГИЙН БАЙГУУЛЛАГЫН ХАМТЫН АЖИЛЛАГААНЫ ТУХАЙ
МОНГОЛ УЛС БОЛОН БҮГД НАЙРАМДАХ ЧЕХ УЛС ХООРОНДЫН
ХЭЛЭЛЦЭЭР”-ИЙГ СОЁРХОН БАТЛАХ ТУХАЙ ХУУЛИЙН ТӨСЛИЙН
ҮР НӨЛӨӨНИЙ ҮНЭЛГЭЭ**

Агуулга

Нэг. Ерөнхий зүйл

Хоёр. Хуулийн төслийн үр нөлөөг үнэлэх шалгуур үзүүлэлт

Гурав. Хуулийн төслөөс үр нөлөөг үнэлэх эсэхээ тогтоосон байдал

Дөрөв. Шалгуур үзүүлэлтэд тохирох шалгах хэрэгслийн дагуу хуулийн төслийн үр нөлөөг үнэлсэн байдал

1. Зорилгод хүрэх байдал
2. Практикт хэрэгжих боломж
3. Ойлгомжтой байдал
4. Харилцан уялдаа

Тав. Үр дүнг үнэлж, зөвлөмж өгсөн байдал

НЭГ. ЕРӨНХИЙ ЗҮЙЛ

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийг соёрхон батлах тухай хуулийн төсөл нь Хууль тогтоомжийн тухай хуулийн¹ 22 дугаар зүйлийн 22.1 дэх хэсгийн 22.1.1 дэх заалтад заасан анхдагч хуулийн төсөл бөгөөд мөн хуулийн 17 дугаар зүйлийн 17.2 дахь хэсэгт заасны дагуу хуулийн төсөлд дүн шинжилгээ хийх, үр нөлөөг тооцох, давхардал, хийдэл, зөрчлийг арилгах, хуулийн зүйл заалтыг ойлгомжтой, хэрэгжих боломжтой байдлаар боловсруулах зорилгоор хуулийн төслийн үр нөлөөг үнэлэх судалгааг хийж гүйцэтгэлээ.

Хуулийн төслийн үр нөлөөг үнэлэх энэхүү судалгааг Монгол Улсын Засгийн газрын 2016 оны “Аргачлал батлах тухай” 59 дугаар тогтоолын² 3 дугаар хавсралтаар баталсан “Хууль тогтоомжийн төслийн үр нөлөөг үнэлэх аргачлал”-д³ заасны дагуу дараах үе шатаар хийж гүйцэтгэв. Үүнд:

¹ <https://legalinfo.mn/mn/detail?lawId=11119>

² <https://legalinfo.mn/mn/detail?lawId=11993>

³ <https://legalinfo.mn/mn/detail?lawId=207335&showType=1>

1. Шалгуур үзүүлэлтийг сонгох;
2. Хуулийн төслөөс үр нөлөө тооцох эсэхээ тогтоох;
3. Шалгуур үзүүлэлтэд тохирох шалгах хэрэгслийн дагуу үр нөлөөг тооцох;
4. Үр дүнг үнэлэх, зөвлөмж өгөх.

ХОЁР. ХУУЛИЙН ТӨСЛИЙН ҮР НӨЛӨӨГ ҮНЭЛЭХ ШАЛГУУР ҮЗҮҮЛЭЛТ

Хуулийн төслийн үр нөлөөг үнэлэх энэхүү судалгааг хийж гүйцэтгэхдээ “Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийн зорилго, хамрах хүрээ, уг хэлэлцээрээр зохицуулах харилцаа зэрэгтэй уялдуулан дээр дурдсан аргачлалд заасны дагуу дараах 4 шалгуур үзүүлэлтийг сонгож авав. Үүнд:

1. Зорилгод хүрэх байдал
2. Практикт хэрэгжих боломж
3. Ойлгомжтой байдал
4. Харилцан уялдаа

“Зорилгод хүрэх байдал” гэсэн шалгуур үзүүлэлтийн хүрээнд “Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийг соёрхон батлах тухай хуулийн төслийн зохицуулалт нь хуулийн төслийн үзэл баримтлал буюу хуулийн төслийг боловсруулах болсон үндэслэл, шаардлагад нийцсэн эсэх, мөн хуулийн төслийг тодорхой илэрхийлж чадахуйц зохицуулалтын хувилбарыг агуулсан эсэхийг тогтоох зорилгын үүднээс уг шалгуур үзүүлэлтийг сонгож авав.

“Практикт хэрэгжих боломж” гэсэн шалгуур үзүүлэлтийн хүрээнд Монгол Улсын Их Хурлаас соёрхон батлах энэхүү хэлэлцээрт туссан дараах зохицуулалтуудын практикт хэрэгжих боломжийг шалгах зорилгын үүднээс сонгож авлаа. Үүнд:

- Хэлэлцээрээр зохицуулсан талуудын хамтран ажиллах, тэмцэх, урьдчилан сэргийлэх гэмт хэргийн төрөл, хэлбэр болон талуудын хамтын ажиллагааны чиглэл нь сүүлийн жилүүдэд олон улсын түвшинд болон бүс нутгийн хэмжээнд гарч буй хил дамнасан, зохион байгуулалттай гэмт хэргийг илрүүлэх, түүнээс урьдчилан сэргийлэх, тэмцэхэд тодорхой хэмжээнд ахиц гарахад нөлөө үзүүлэх эсэхийг үнэлэх;
- Хэлэлцээрт туссан зохицуулалтууд хэлэлцэн тохирогч талуудын дотоодын хууль тогтоомж, нэгдэн орсон бусад олон улсын олон талт гэрээ, конвенц болон талуудын бусад улс орнуудтай байгуулсан олон улсын гэрээ, хэлэлцээрт нийцсэн эсэхийг үнэлэх;

- Хэлэлцээрийн хүрээнд эрүүгийн хэрэг хянан шийдвэрлэх ажиллагааны хэрэг бүртгэх, мөрдөн байцаах шатанд хоёр улсын цагдаагийн байгууллагын мөрдөгчид түргэн, шуурхай хамтран ажиллах боломжтой эсэхийг үнэлэх;
- Хэлэлцээрийн хүрээнд хэлэлцэн тохирогч талуудын эрүүгийн хэрэг хянан шийдвэрлэх ажиллагаанд хамаарах, мөн хуулиар хамгаалагдсан нууц мэдээлэлтэй танилцах, харилцан дамжуулах, солилцох, түүнийг хадгалах, хамгаалахтай холбогдох зохицуулалтыг үнэлэх;
- Хэлэлцээрийн хүрээнд хэлэлцэн тохирогч талууд хүний хувийн мэдээллийг авахаар нөгөө талдаа хүсэлт гаргах, хүсэлтийн дагуу тухайн мэдээллийг шилжүүлэх, мэдээллийг хүлээн авсан талын мэдээллийг бүртгэх, ашиглах, хамгаалах устгах арга хэлбэрийн талаарх зохицуулалтыг үнэлэх.

“Ойлгомжтой байдал” гэсэн шалгуур үзүүлэлтийн хүрээнд “Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийг соёрхон батлах тухай хуулийн төслийн зохицуулалтыг уг хуулийг хэрэглэх, хэрэгжүүлэх субъектүүдэд ойлгомжтой байхаар, мөн монгол хэлний хэл зүйн болон найруулгын хувьд ойлгомжтой, логик дараалалтай боловсруулсан эсэхийг Хууль тогтоомжийн тухай хууль болон Хууль тогтоомжийн төсөл боловсруулах аргачлалд заасан шаардлагын дагуу үнэлэхийг удирдлага болгов.

Харин “Хууль тогтоомжийн төслийн үр нөлөөг үнэлэх аргачлал”-д заасан 6 шалгуур үзүүлэлтээс “хүлээн зөвшөөрөгдөх байдал” болон “зардал” гэсэн шалгуур үзүүлэлтүүдийг энэхүү үнэлгээнд сонгож аваагүй болно.

ГУРАВ. ХУУЛИЙН ТӨСЛӨӨС ҮР НӨЛӨӨГ ҮНЭЛЭХ ХЭСГЭЭ ТОГТООСОН БАЙДАЛ

“Зорилгод хүрэх байдал” гэсэн шалгуур үзүүлэлтийн хүрээнд:

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр” болон уг хэлэлцээрийг соёрхон батлах тухай хуулийн төслийн зорилго, зорилт, зохицуулалтууд нь хуулийн төслийн үзэл баримтлалд тусгасан үндэслэл, хэрэгцээ шаардлагад нийцэж байгаа эсэхэд харьцуулах байдлаар дүн шинжилгээ хийлээ.

Хуулийн төсөл нь “Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийн хүрээнд дэвшүүлсэн талуудын хамтын ажиллагааны арга, хэлбэрийг тодорхойлох зорилгоор дараах зорилгыг дэвшүүлсэн байна. Үүнд:

1. Гэмт хэрэгтэй тэмцэх, түүнээс урьдчилан сэргийлэх, гэмт этгээдийг олж тогтоох, олон нийтийн аюулгүй байдлыг хангах, нийтийн хэв журмыг сахиулахад хэлэлцэн тохирогч талууд идэвхтэй хамтран ажиллах;
2. Зохион байгуулалттай гэмт хэргээс урьдчилан сэргийлэхэд онцгойлон анхаарахын зэрэгцээ энэ төрлийн гэмт хэрэгтэй тэмцэх чиглэлээр хамтран ажиллах.

Дээр дурдсан зорилгыг хангах чиглэлээр тодорхой зохицуулалтыг хуулийн төсөлд тусгасан байдлыг шалгаж үнэлэхэд:

Зорилт 1. Гэмт хэрэгтэй тэмцэх, түүнээс урьдчилан сэргийлэх, гэмт этгээдийг олж тогтоох, олон нийтийн аюулгүй байдлыг хангах, нийтийн хэв журмыг сахиулахад хэлэлцэн тохирогч талуудын холбогдох эрх бүхий байгууллагууд өөр хоорондоо шууд харилцах замаар шуурхай арга хэмжээ авах хүрээнд:

Манай улсын дотоодын хууль тогтоомжид зохицуулснаар эрүүгийн хэрэг хянан шийдвэрлэх ажиллагааны хэрэг бүртгэх, мөрдөн байцаах шатанд гэмт хэрэгт ач холбогдол бүхий мэдээ мэдээлэл, холбогдох баримт бичиг зэргийг харилцан солилцох ажиллагааг эрх зүйн харилцан туслалцааны нэг хэлбэр болгон авч үзсэн төдийгүй энэхүү хүсэлтийг айлын талд илгээхдээ хууль зүйн асуудал эрхэлсэн төрийн захиргааны төв байгууллага, улмаар дипломат шугамаар дамжуулахаар тусгасан.

Харин эрх бүхий байгууллагуудын тухайд гэмт хэрэгтэй тэмцэх, түүнээс урьдчилан сэргийлэх, гэмт этгээдийг олж тогтооход түргэн шуурхай хариу арга хэмжээ авч байх хэрэгцээ шаардлагын үүднээс хоёр улсын цагдаагийн байгууллагын мөрдөгчид өөр хоорондоо шууд харилцах замаар хамтран ажиллах боломжийн талаар хэлэлцээрт хэрхэн тусгаж, зохицуулсан болохыг үнэлгээ хийх үүднээс сонгосон болно.

Зорилт 2. Зохион байгуулалттай гэмт хэрэгт онцгойлон анхаарахын зэрэгцээ ялангуяа хар тамхи, мансууруулах эм, сэтгэцэд нөлөөт бодисын хууль бус эргэлт, терроризм, түүнийг санхүүжүүлэх, хүн худалдаалахтай холбоотой, мөн цахим орчинд үйлдэгдэж буй хууль бус мөрийтэй тоглоом, залилан мэхлэх, садар самууныг сурталчлахтай холбоотой гэмт хэрэгтэй тэмцэх чиглэлээр хамтран ажиллах хүрээнд:

Монгол Улсын хэмжээнд 2023 оны байдлаар хар тамхи, мансууруулах эм, сэтгэцэд нөлөөт бодисын хууль бус эргэлттэй холбоотой гэмт хэрэг 238, кибер аюулгүй байдлын эсрэг гэмт хэрэг 388 бүртгэгдсэн⁴ нь өмнөх оноос өссөн үзүүлэлттэй байгаа бөгөөд тухайн төрлийн гэмт хэргийг илрүүлэх, таслан зогсоох

⁴ “Цагдаагийн байгууллагын хэмжээнд бүртгэгдсэн гэмт хэрэг, зөрчлийн нөхцөл байдал” товхимол (2022 он, 2023 он).

чиглэлээр бүс нутгийн төдийгүй олон улсын цагдаа, хууль сахиулах байгууллагуудтай түргэн, шуурхай хамтран ажиллах хэрэгцээ шаардлагыг бий болгож байгаа тул энэ төрлийн гэмт хэргүүдээс урьдчилан сэргийлэх, илрүүлэх, гэмт хэргийн зохион байгуулагчийг олж тогтоох чиглэлд талуудын хамтын ажиллагааг хөгжүүлэн бэхжүүлэх талаарх зохицуулалтыг хэлэлцээрт хэрхэн тусгасан болохыг үнэлгээ хийх үүднээс сонгосон болно.

ДӨРӨВ. ШАЛГУУР ҮЗҮҮЛЭЛТЭД ТОХИРОХ ШАЛГАХ ХЭРЭГСЛИЙН ДАГУУ ХУУЛИЙН ТӨСЛИЙН ҮР НӨЛӨӨГ ҮНЭЛСЭН БАЙДАЛ

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийг соёрхон батлах тухай хуулийн төслийн үр нөлөөг үнэлэх шалгуур үзүүлэлтийг сонгож, үр нөлөөг үнэлэх хэсгээ тогтоосон тул тэдгээрт тохирох шалгах хэрэгслийг дараах байдлаар авч үзэв. Үүнд:

Д/д	Шалгуур үзүүлэлт	Үр нөлөөг үнэлэх хэсэг	Тохирох шалгах хэрэгсэл
1	Зорилгод хүрэх байдал	Хуулийн төслийн холбогдох зохицуулалтууд	Хуулийн төслийн үзэл баримтлалд дэвшүүлсэн зорилтыг хангасан эсэхэд дүн шинжилгээ хийх, сонгосон зохицуулалт, арга хэмжээ зорилгод хүрэх боломжтой эсэхийг тодорхойлох.
2	Практикт хэрэглэх боломж	Хэлэлцээрийн 1-8 дугаар зүйл, 17, 18, 27, 29 дүгээр зүйл болон хэлэлцээрийн Хавсралт	Хуулийн төслийг хэрэгжүүлэх субъект байгаа эсэх, дүн шинжилгээ хийх.
3	Ойлгомжтой байдал	Хуулийн төсөл бүхэлдээ	Хууль тогтоомжийн тухай хуулийн 28, 29 дүгээр зүйлд заасан шаардлагыг хангасан эсэх, Хууль тогтоомжийн төсөл боловсруулах аргачлалд заасан шаардлагыг хангасан эсэхийг шалгах.
4	Харилцан уялдаа	Хуулийн төслийн зарим хэсэг	Хууль тогтоомжийн төсөл боловсруулах аргачлалын 4.10-т заасан стандарт асуултад хариулах замаар

			хуулийн төслийн уялдааг тодорхойлох.
--	--	--	--------------------------------------

Дээрх шалгуур үзүүлэлтэд тохирсон шалгах хэрэгслийн дагуу хуулийн төслийн үр нөлөөг дараах байдлаар үнэлэв. Үүнд:

1. “Зорилгод хүрэх байдал” шалгуур үзүүлэлтийн хүрээнд хийсэн үнэлгээ:

Зорилт 1. *Гэмт хэрэгтэй тэмцэх, түүнээс урьдчилан сэргийлэх, гэмт этгээдийг олж тогтоох, олон нийтийн аюулгүй байдлыг хангах, нийтийн хэв журмыг сахиулахад хэлэлцэн тохирогч талуудын холбогдох эрх бүхий байгууллагууд өөр хоорондоо шууд харилцах замаар шуурхай арга хэмжээ авах талаар үнэлгээ хийсэн нь:*

Хэлэлцээрийн гол зорилго, талуудын хамтран тэмцэх, урьдчилан сэргийлэх зохион байгуулалттай гэмт хэргийн төрөл, хэлбэрийг тодорхойлохын зэрэгцээ уг хэлэлцээрийн хүрээнд зохион байгуулалттай гэмт хэргээс урьдчилан сэргийлэх, илрүүлэх, гэмт хэргийн зохион байгуулагчийг олж тогтоох чиглэлд талуудын хамтын ажиллагааг хөгжүүлэн бэхжүүлэх, олон нийтийн аюулгүй байдал, хэв журам зөрчигдөхөөс урьдчилан сэргийлэх чиглэлд хоёр улсын эрх бүхий байгууллагууд өөр хоорондоо шууд харилцаж, түргэн шуурхай хамтран ажиллах боломжтой юм.

Түүнчлэн энэхүү хэлэлцээрээр дамжуулан эрүүгийн хэрэг хянан шийдвэрлэх ажиллагааны хэрэг бүртгэх, мөрдөн байцаах шатанд хоёр улсын цагдаагийн байгууллагын мөрдөгчид эрх зүйн туслалцааны хүсэлт гаргах замаар гэрч, шинжээч, сэжигтэн, яллагдагч болон бусад этгээдээс тайлбар, мэдүүлэг авахаас гадна талууд хэрэг хянан шийдвэрлэх ажиллагааны нууцад хамаарах баримт бичиг, мэдээлэл, нотлох баримтыг харилцан солилцох боломжтой болж байгаа юм.

Зорилт 2. *Зохион байгуулалттай гэмт хэрэгт онцгойлон анхаарахын зэрэгцээ ялангуяа хар тамхи, мансууруулах эм, сэтгэцэд нөлөөт бодисын хууль бус эргэлт, терроризм, түүнийг санхүүжүүлэх, хүн худалдаалахтай холбоотой, мөн цахим орчинд үйлдэгдэж буй хууль бус мөрийтэй тоглоом, залилан мэхлэх, садар самууныг сурталчлахтай холбоотой гэмт хэрэгтэй тэмцэх чиглэлээр хамтран ажиллах талаар үнэлгээ хийсэн нь:*

Хэлэлцээрийн хүрээнд талуудын эрх бүхий байгууллагууд зохион байгуулалттай гэмт хэрэг үйлдсэн зохион байгуулагч, тэдгээрийн холбоо хамаарал, бүтэц, гэмт хэрэг үйлдэхдээ ашигласан арга техник, мөн террорист бүлэглэл, тэдгээрийн үйлдсэн гэмт хэрэг, цогцост шүүх шинжилгээний байгууллагаас хийсэн үзлэг, шинжилгээний дүгнэлт, криминологийн судалгаа, мөрдөн шалгах ажиллагааны арга тактик, түүнчлэн талуудын нутаг дэвсгэрт хилээр нэвтрэхдээ ашигласан бичиг баримт, оршин байгаа газар гэх зэрэг мэдээлэл, цагдаагийн байгууллагын бүртгэл, мэдээллийн сангийн мэдээллийг харилцан солилцохоос

гадна талуудын хамтын ажиллагаанд дэмжлэг үзүүлж, зөвлөгөө өгч ажиллах чиг үүрэг бүхий офицер, зөвлөх гэх мэргэжилтнүүдийг харилцан илгээхтэй холбоотой харилцааг зохицуулсан байна.

Тухайлбал, хэлэлцээрийн хүрээнд талууд дараах төрлийн гэмт хэрэгтэй тэмцэх чиглэлд хамтран ажиллахаар тохиролцжээ. Үүнд:

- (a) Бусдын амь нас, эрүүл мэнд, эрх чөлөө, алдар хүндийн эсрэг;
- (b) Терроризм, түүнийг санхүүжүүлэх;
- (c) Хүн худалдаалах, биеэ үнэлүүлэх, зуучлах, түүнчлэн хүний эд, эрхтэнийг худалдаалах;
- (d) Хүүхдийн эсрэг бэлгийн хүчирхийлэл болон хүүхэд ашигласан порнограф;
- (e) Хэт даврах, арьс үндсээр алагчилах болон хэт үндсэрхэг үзэл гаргах;
- (f) 1988 оны 12 дугаар сарын 20-ны өдрийн “Мансууруулах эм, сэтгэцэд нөлөөлөх бодисын хууль бус эргэлтийн эсрэг Нэгдсэн Үндэстний Байгууллагын конвенц”-д заасан мансууруулах эм болон сэтгэцэд нөлөөлөх бодисын хууль бус эргэлт, тэр дундаа тэдгээрийн угтвар бодисын хууль бус эргэлт;
- (g) Галт зэвсэг, зэвсгийн шинж чанартай зүйл, сум, тэсрэх бодис, тэсрэх төхөөрөмж, химийн, биологийн, цацраг идэвхт бодис болон цөмийн материалыг, мөн стратегийн ач холбогдол бүхий бараа, технологи болон цэргийн эд зүйл, хэрэгсэл, түүнчлэн онц аюултай бусад төрлийн бодис болон аюултай хог хаягдлыг хууль бусаар үйлдвэрлэх, зуучлах, эзэмших, импортлох, экспортлох, дамжин тээвэрлэх болон худалдаалах;
- (h) Мөнгө угаах гэмт хэрэг;
- (i) Цахим гэмт хэрэг;
- (j) Өмчийн эсрэг гэмт хэрэг, тухайлбал залилах, хулгайлах, тээврийн хэрэгслийг бусад хууль бус хэлбэрээр ашиглах;
- (k) Мөнгөн тэмдэгт, тэмдэг, үнэт цаас, бэлэн бус төлбөрийн хэрэгсэл болон албан баримт бичиг, ялангуяа гадаад паспорт хуурамчаар үйлдэх, өөрчлөх, нийлүүлэх, ашиглах;
- (l) Оюуны өмчийн эсрэг гэмт хэрэг;
- (m) Эдийн засгийн бусад ноцтой гэмт хэрэг;
- (n) Соёлын болон түүхийн үнэт зүйлийн эсрэг гэмт хэрэг;
- (o) Хүрээлэн буй орчны эсрэг гэмт хэрэг, ялангуяа ховор, нэн ховор ургамал, амьтан, түүний төрөл зүйлийг хууль бусаар худалдах.

Мөн хэлэлцэн тохирогч талуудын хамтын ажиллагааны тусгай хэлбэрүүд буюу тусгай хамгаалалт шаардагдах аливаа этгээдийг хамгаалах, тээвэрлэх, хилээр нэвтрүүлэх, уг этгээдэд холбогдох бүхий л төрлийн мэдээллийг харилцан солилцох, түүнчлэн талууд “Гамшгийн үеийн хохирогчийг тодорхойлох баг”-ийг томилох замаар тодорхой төрлийн ажиллагааг гүйцэтгүүлэхээр хэлэлцэн тохирогч нөгөө талын нутаг дэвсгэрт илгээх тухай асуудлыг хэлэлцээрт мөн зохицуулсан байна.

2. “Практикт хэрэгжих боломж” шалгуур үзүүлэлтийн хүрээнд хийсэн үнэлгээ:

1) *Хэлэлцээрээр зохицуулсан талуудын хамтран ажиллах, тэмцэх, урьдчилан сэргийлэх гэмт хэргийн төрөл, хэлбэр болон талуудын хамтын ажиллагааны чиглэл нь сүүлийн жилүүдэд олон улсын түвшинд болон бүс нутгийн хэмжээнд гарч буй хил дамнасан, зохион байгуулалттай гэмт хэргийг илрүүлэх, түүнээс урьдчилан сэргийлэх, тэмцэхэд тодорхой хэмжээнд ахиц гарахад нөлөө үзүүлэх эсэх талаарх үнэлгээ:*

Дэлхийн улс орнууд даяаршиж, нэгдмэл болохын хэрээр аюул занал ч мөн нийтлэг шинж чанартай болж байгаатай холбогдуулан ихэнх улс орон бүс нутгийн аюулгүй байдлыг хамтран хамгаалах тогтолцоог бий болгоход илүүтэй анхаарч байна.

Гадаад улс орнуудад үндэстэн дамнасан зохион байгуулалттай, нууц, далд аргаар үйлдэгдсэн гэмт хэрэг, гэмт хэргийн үйлдлийн арга, зохион байгуулалтын хэлбэрийг илрүүлэх, таслан зогсооход хүндрэл учирч байгаагийн зэрэгцээ нэг улсын хил хязгаараас давж, улс орон дамжин үйлдэгдэх хандлага нэмэгдэж байгаа нь хэд хэдэн улсын цагдаагийн байгууллага хамтран гэмт хэрэгтэй тэмцэх, мөрдөн шалгах ажиллагаа явуулах хэрэгцээ, шаардлага бий болсоор байна.

Мөн манай улсын иргэдийн гадаад улсад зорчих тоо жил ирэх тусам өсөж байгаатай холбоотойгоор гадаад улсад гэмт хэрэг, зөрчилд холбогдох, түүнчлэн гэмт хэрэг, зөрчлийн улмаас хууль ёсны эрх ашиг нь хөндөгдөх, аливаа хэлбэрээр эд хөрөнгөд нь хохирол учрах явдал нэмэгдсээр байна.

Монгол Улсын хэмжээнд 2023 оны байдлаар хар тамхи, мансууруулах эм, сэтгэцэд нөлөөт бодисын хууль бус эргэлттэй холбоотой гэмт хэрэг 238, кибер аюулгүй байдлын эсрэг гэмт хэрэг 388 бүртгэгдсэн нь өмнөх оноос өссөн үзүүлэлттэй байгаа бөгөөд тухайн төрлийн гэмт хэргийг илрүүлэх, таслан зогсоох чиглэлээр бүс нутгийн төдийгүй олон улсын цагдаа, хууль сахиулах байгууллагуудтай түргэн, шуурхай хамтран ажиллах хэрэгцээ шаардлагыг бий болгож байна.

Мөн цахим орчинд үйлдэгдэж буй хууль бус мөрийтэй тоглоом, залилан мэхлэх, садар самууныг сурталчлах, хүн худалдаалах зэрэг гэмт хэргүүд зохион байгуулалттай хэлбэрт шилжиж, энэ төрлийн гэмт хэргийн гаралт, насанд хүрээгүй хохирогчдын тоо жил бүр өсөн нэмэгдэж байгаагийн зэрэгцээ зүүн Европын орнууд болох Албани, Серби зэрэг улсын гэмт бүлэглэлүүдийн үйлдлийн арга, хэлбэртэй төстэйгээр үйлдэгдэж байгаа нь Чех Улстай энэ чиглэлийн хамтын ажиллагааг өргөжүүлэх хэрэгцээг илэрхийлж байгаа юм.

Иймд “Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийн хүрээнд Чех Улсаар

дамжин Европын холбооны 27 улсад ажиллаж, амьдарч буй Монгол Улсын иргэдийн эрх ашгийг хамгаалах, зөрчигдсэн эрхийг сэргээх, гэмт хэрэгтэй тэмцэх, урьдчилан сэргийлэх үүднээс шуурхай мэдээлэл солилцох, хамтран ажиллахад чухал ач холбогдолтой хэлэлцээр гэж үзэж байна.

2) *Хэлэлцээрт туссан зохицуулалтууд хэлэлцэн тохирогч талуудын дотоодын хууль тогтоомж, нэгдэн орсон бусад олон улсын олон талт гэрээ, конвенц болон талуудын бусад улс орнуудтай байгуулсан олон улсын гэрээ, хэлэлцээрт нийцсэн эсэх талаарх үнэлгээ:*

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ээр зохицуулсан харилцаа, хамтын ажиллагааг хэрэгжүүлэхдээ Монгол Улсын Эрүүгийн хууль, Эрүүгийн хэрэг хянан шийдвэрлэх тухай хууль болон бусад холбогдох хууль тогтоомжийг дагаж мөрдөнө.

Мөн талууд үндэстэн дамнасан зохион байгуулалттай гэмт хэрэг, терроризмтой үр нөлөөтэй тэмцэхийг зорьж байгаагийн зэрэгцээ 2000 оны 11 дүгээр сарын 15-ны өдөр батлагдсан бөгөөд хэлэлцэн тохирогч талуудын нэгдэн орсон “Үндэстэн дамнасан зохион байгуулалттай гэмт хэргийн эсрэг Нэгдсэн Үндэстний Байгууллагын конвенц” болон түүний Протоколуудыг харгалзан үзэхээ илэрхийлжээ.

Түүнчлэн энэхүү хэлэлцээрт талуудын нэгдэн орсон бусад олон улсын гэрээгээр хүлээсэн үүргээ биелүүлэх, үндэсний хууль тогтоомжийг дагаж мөрдөхтэй холбогдох зохицуулалтыг тусгасан бөгөөд уг хэлэлцээрийн 27 дугаар зүйлд “Энэхүү Хэлэлцээр нь Хэлэлцэн тохирогч Талуудын заавал дагаж мөрдөх олон улсын бусад хоёр талт болон олон талт гэрээгээр хүлээсэн үүргийг хөндөхгүй” гэж зохицуулсан байна.

3) *Хэлэлцээрийн хүрээнд эрүүгийн хэрэг хянан шийдвэрлэх ажиллагааны хэрэг бүртгэх, мөрдөн байцаах шатанд хоёр улсын цагдаагийн байгууллагын мөрдөгчид түргэн, шуурхай хамтран ажиллах боломжтой эсэх талаарх үнэлгээ:*

Хэлэлцээрийн хүрээнд эрүүгийн хэрэг хянан шийдвэрлэх ажиллагааны хэрэг бүртгэх, мөрдөн байцаах шатанд хоёр улсын цагдаагийн байгууллагын мөрдөгчид эрх зүйн туслалцааны хүсэлт гаргах замаар гэрч, шинжээч, сэжигтэн, яллагдагч болон бусад этгээдээс тайлбар, мэдүүлэг авахын зэрэгцээ талууд хэрэг хянан шийдвэрлэх ажиллагааны нууцад хамаарах баримт бичиг, мэдээлэл, нотлох баримтыг харилцан солилцох боломжтой юм.

Мөн эрүүгийн хэрэг мөрдөн шалгах тодорхой ажиллагааг Чех Улсын нутаг дэвсгэрт гүйцэтгэх боломжтой болох бөгөөд энэ нь эрүүгийн хэргийн шийдвэрлэлтийг нэмэгдүүлэх, гэмт хэрэгтэй үр дүнтэй тэмцэх, өөрийн улсын иргэд, хуулийн этгээдийн хууль ёсны эрх ашгийг хамгаалах, хангах нөхцөлийг бүрдүүлэхийн зэрэгцээ зохион байгуулалттай гэмт хэргээс урьдчилан сэргийлэх,

илрүүлэх, гэмт хэргийн зохион байгуулагчийг олж тогтоох чиглэлд талуудын хамтын ажиллагааг хөгжүүлэн бэхжүүлэх, олон нийтийн аюулгүй байдал, хэв журам зөрчигдөхөөс урьдчилан сэргийлэх чиглэлд хоёр улсын эрх бүхий байгууллагууд өөр хоорондоо шууд харилцаж, түргэн шуурхай хамтран ажиллах боломжийг бүрдүүлж өгсөн байна.

Түүнчлэн талууд хэлэлцээрийн хүрээнд өөр хоорондоо харилцах эрх бүхий байгууллагыг харилцан томилохоор зохицуулсан ба энэ талаар хэлэлцээрийн 3 дугаар зүйлийн 1 дэх хэсэгт “Хэлэлцэн тохирогч Талууд энэхүү Хэлэлцээр хүчин төгөлдөр болох өдрөөс өмнө энэхүү Хэлэлцээрийн хүрээнд хамтран ажиллах эрх бүхий байгууллагуудын талаар харилцан бие биедээ дипломат шугамаар мэдэгдэнэ. Ингэхдээ эрх бүхий байгууллагуудын холбоо барих хаяг, утас, факсын дугаар, эсхүл өөр бусад харилцах мэдээллийг мэдэгдэнэ” гэж заажээ.

Дээр дурдсанаас гадна талууд хэлэлцээрийг илүү үр дүнтэй хэрэгжүүлэх үүднээс шаардлагатай тохиолдолд тусгайлсан тохиролцоо хийх боломжийн талаар хэлэлцээрт зохицуулсан бөгөөд энэ талаар хэлэлцээрийн 25 дугаар зүйлд “Хэлэлцэн тохирогч Талуудын Засгийн газар, цаашилбал Монголын талаас Хууль зүй, дотоод хэргийн яам, Чехийн талаас Дотоод хэргийн яам болон Сангийн яам шаардлагатай тохиолдолд энэхүү Хэлэлцээрийн хүрээнд хэрэгжилтийн тохиролцоо байгуулж болно” гэж тусгасан байна.

4) *Хэлэлцээрийн хүрээнд хэлэлцэн тохирогч талууд эрүүгийн хэрэг хянан шийдвэрлэх ажиллагаанд хамаарах бөгөөд хуулиар хамгаалагдсан нууц мэдээлэлтэй танилцах, харилцан дамжуулах, солилцох, түүнийг хадгалах, хамгаалахтай холбогдох зохицуулалтын талаарх үнэлгээ:*

Хэлэлцэн тохирогч Талууд эрүүгийн хэрэг хянан шийдвэрлэх ажиллагаанд хамаарах, мөн хуулиар хамгаалагдсан нууц мэдээлэлтэй танилцах, харилцан дамжуулах, солилцох, түүнийг хадгалах, хамгаалахдаа дотоодын хууль тогтоомжийг баримтлахаар зохицуулсан.

Тухайлбал, манай улсын хувьд Эрүүгийн хэрэг хянан шийдвэрлэх тухай хууль, Төрийн болон албаны нууцын тухай хууль, түүнчлэн Засгийн газрын 2017 оны 246 дугаар тогтоолоор баталсан “Монгол Улсын төрийн болон албаны нууцыг хамгаалах нийтлэг журам” болон холбогдох бусад хууль тогтоомжид заасан зохицуулалтыг дагаж мөрдөх юм.

Түүнчлэн хэлэлцээрийн 18 дугаар зүйлд нууц мэдээллийг шилжүүлэх, харилцан хамгаалахтай холбогдох харилцааг дэлгэрүүлэн зохицуулж өгсөн бөгөөд уг хэлэлцээрийн Хавсралт хэсэгт талуудын дотоодын хууль тогтоомжийн дагуу тогтоосон нууцын ангилал, зэрэглэлийг дүйцүүлэн заасан ба талууд харилцан мэдээлэл солилцохдоо тухайн хавсралтад заасан нууцын зэрэглэлийг илэрхийлсэн тэмдэглэгээг хэрэглэх тухай асуудлыг тусгасан байна.

5) *Хэлэлцээрийн хүрээнд хэлэлцэн тохирогч талууд хүний хувийн мэдээллийг авахаар нөгөө талдаа хүсэлт гаргах, хүсэлтийн дагуу мэдээллийг шилжүүлэх, мэдээллийг хүлээн авсан талын мэдээллийг бүртгэх, ашиглах, хамгаалах устгах арга хэлбэрийн талаарх зохицуулалтын талаарх үнэлгээ:*

Хэлэлцэн тохирогч Талууд хүний хувийн мэдээллийг авах, авахаар хүсэлт гаргах, улмаар энэхүү хүсэлтийг үндэслэн тухайн мэдээллийг нөгөө талд шилжүүлэх, мөн мэдээллийг хүлээн авсан тал уг мэдээллийг бүртгэх, ашиглах, хамгаалахдаа дотоодынхоо хууль тогтоомжийг баримтлахаар зохицуулсан.

Тухайлбал, манай улсын хувьд Эрүүгийн хэрэг хянан шийдвэрлэх тухай хууль, Хүний хувийн мэдээлэл хамгаалах тухай хууль болон холбогдох бусад хууль тогтоомжид заасан зохицуулалтыг дагаж мөрдөх юм.

Мөн хэлэлцээрийн 4 дүгээр хэсэгт талуудын хувийн мэдээллийг авахаар нөгөө талдаа хүсэлт гаргах, хүсэлтийн дагуу мэдээллийг шилжүүлэх, мэдээллийг хүлээн авсан тал тухайн мэдээллийг бүртгэх, ашиглах, хамгаалах устгах арга хэлбэрийг тодорхойлсон ба хэлэлцээрийн 17 дугаар зүйлийн (а) хэсэгт "... хувийн мэдээллийг энэхүү Хэлэлцээрийн хүрээнд зөвшөөрөх бөгөөд гэмт хэргээс урьдчилан сэргийлэх, илрүүлэх, мөн олон нийтийн аюулгүй байдал, нийтийн хэв журам зөрчигдөхөөс урьдчилан сэргийлэх зорилгоор Хэлэлцэн тохирогч Талаас тавьсан нөхцөлийн дагуу ашиглана" гэж зохицуулжээ.

Түүнчлэн хувийн мэдээллийг шилжүүлэн өгсөн талын хүсэлтээр уг мэдээллийг хүлээн авсан тал тухайн мэдээллээ хэрхэн ашигласан талаар болон түүнийг ашигласнаар гарсан үр дүнгийн талаар нөгөө талд мэдээллэх тухай зохицуулалтыг мөн тусгаж өгсөн байна.

3. "Ойлгомжтой байдал" шалгуур үзүүлэлтийн хүрээнд хийсэн үнэлгээ:

"Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр"-ийг соёрхон батлах тухай хуулийн төсөл нь Хууль тогтоомжийн тухай хуулийн 23 дугаар зүйлийн 23.1 дэх хэсэгт заасанчлан нийгмийн тодорхой төрлийн харилцааг шинэ хуулиар зохицуулж байгаа тул Хууль тогтоомжийн тухай хуулийн 29 дүгээр зүйлд заасан хууль тогтоомжийн төслийн эх бичвэрийн агуулгад тавих нийтлэг шаардлага, мөн хуулийн 30 дугаар зүйлд заасан хуулийн төслийн хэл зүй, найруулгад тавих нийтлэг шаардлагад нийцүүлэн боловсруулсан эсэхийг хянах байдлаар үнэлгээг хийж гүйцэтгэлээ.

Дээрх хэлэлцээр нь 5 хэсэг, 29 зүйл, хавсралтаас бүрдэж байгаа бөгөөд Хууль тогтоомжийн тухай хуулийн 29 дүгээр зүйлд заасан хууль тогтоомжийн төслийн эх бичвэрийн агуулгад тавих нийтлэг шаардлага, мөн хуулийн 30 дугаар зүйлд заасан хуулийн төслийн хэл зүй, найруулгад тавих нийтлэг шаардлагад

нийцүүлэн боловсруулсан эсэхийг дараах асуултад хариулт өгөх замаар шалгаж үзлээ.

Хууль тогтоомжийн тухай хуулийн 29 дүгээр зүйлд заасан хуулийн төслийн эх бичвэрийн агуулгад тавих нийтлэг шаардлага	
<i>Хууль тогтоомжийн тухай хуулийн зохицуулалт</i>	<i>Шаардлага хангасан эсэх</i>
29.1.1.Монгол Улсын Үндсэн хууль, Монгол Улсын олон улсын гэрээнд нийцсэн, бусад хууль, үндэсний аюулгүй байдлын үзэл баримтлал, Монгол Улсын урт хугацааны хөгжлийн бодлоготой уялдсан байх	Шаардлага хангасан
29.1.2.тухайн хуулиар зохицуулах нийгмийн харилцаанд хамаарах асуудлыг бүрэн тусгасан байх	Шаардлага хангасан
29.1.3.тухайн хуулиар зохицуулах нийгмийн харилцааны хүрээнээс хальсан асуудлыг тусгахгүй байх	Шаардлага хангасан
29.1.4.тухайн хуулиар зохицуулах нийгмийн харилцаанд үл хамаарах хуульд нэмэлт, өөрчлөлт оруулах буюу хүчингүй болсонд тооцох тухай заалт тусгахгүй байх	Шаардлага хангасан
29.1.5.зүйл, хэсэг, заалт нь хоорондоо зөрчилгүй байх	Шаардлага хангасан
29.1.6.хэм хэмжээ тогтоогоогүй, тунхагласан шинжтэй буюу нэг удаа хэрэгжүүлэх заалт тусгахгүй байх	Шаардлага хангасан
29.1.7.бусад хуулийн заалтыг давхардуулан заахгүйгээр шаардлагатай бол түүнийг эш татах, энэ тохиолдолд эшлэлийг тодорхой хийж, хуулийн нэр болон хэвлэн нийтэлсэн албан ёсны эх сурвалжийг бүрэн гүйцэд заасан байх	Шаардлага хангасан
29.1.8.тухайн хуулиар зохицуулах нийгмийн харилцаа, хуулийн үйлчлэх хүрээ, эрх зүйн харилцаанд оролцогч хүн, хуулийн этгээдийн эрх, үүрэг, зохицуулалтад удирдлага болгох зарчим, харгалзан үзэх нөхцөл байдал, нийтийн эрх зүйн этгээдийн чиг үүрэг, эрх хэмжээ, тэдгээрийг биелүүлэх журмыг тусгасан байх	Шаардлага хангасан
29.2.Хуулийн төсөлд шаардлагатай тохиолдолд эрх зүйн хэм хэмжээг зөрчсөн этгээдэд хүлээлгэх хариуцлага, хуулийн хүчин төгөлдөр болох хугацаа, хууль буцаан хэрэглэх тухай заалт, хуулийг дагаж мөрдөх журмын зохицуулалт, бусад хуулийн зүйл, хэсэг, заалтыг хүчингүй болсонд тооцох, зарим үг, өгүүлбэр, тоо, тэмдэгт хасах талаар тусгана	Шаардлага хангасан
29.3.Шаардлагатай тохиолдолд бусад хуульд нэмэлт, өөрчлөлт оруулах болон хууль хүчингүй болсонд тооцох тухай дагалдах хуулийн төслийг боловсруулна	Шаардлагагүй

29.4.Энэ хуулийн 14.5-д зааснаас бусад хуулийн төслийг дагалдуулан анхдагч болон шинэчилсэн найруулгын төслийг өргөн мэдүүлэхийг хориглоно	Шаардлагагүй
Хууль тогтоомжийн тухай хуулийн 30 дугаар зүйлд заасан хуулийн төслийн хэл зүй, найруулгад тавих нийтлэг шаардлага	
30.1.1.Монгол Улсын Үндсэн хууль, бусад хуульд хэрэглэсэн нэр томъёог хэрэглэх	Шаардлага хангасан
30.1.2.нэг нэр томъёогоор өөр өөр ойлголтыг илэрхийлэхгүй байх	Шаардлага хангасан
30.1.3.үг хэллэгийг монгол хэл бичгийн дүрэмд нийцүүлэн хоёрдмол утгагүй товч, тодорхой, ойлгоход хялбараар бичих	Шаардлага хангасан
30.1.4.хүч оруулсан нэр томъёо хэрэглэхгүй байх	Шаардлага хангасан
30.1.5.жинхэнэ нэрийг ганц тоон дээр хэрэглэх	Шаардлага хангасан

4. “Харилцан уялдаа” шалгуур үзүүлэлтийн хүрээнд хийсэн үнэлгээ:

Хууль тогтоомжийн төслийн үр нөлөөг үнэлэх аргачлалын 4.10-т заасны дагуу хуулийн төслийн уялдаа холбоог дараах асуултад хариулт өгөх замаар хуулийн төслийн уялдаа холбоог шалгалаа.

Хууль тогтоомжийн төслийн үр нөлөөг үнэлэх аргачлалын 4.10-т заасан хуулийн төслийн уялдаа холбоог тогтооход тавих нийтлэг шаардлага	
<i>Шаардлага</i>	<i>Шаардлага хангасан эсэх</i>
4.10.1.хуулийн төслийн зохицуулалт тухайн хуулийн зорилттой нийцэж байгаа эсэх	Тийм
4.10.2.хуулийн төслийн “Хууль тогтоомж” гэсэн хэсэгт заасан хуулиудын нэр тухайн харилцаанд хамаарах хууль мөн эсэх	-
4.10.3.хуулийн төсөлд тодорхойлсон нэр томъёо тухайн хуулийн төслийн болон бусад хуулийн нэр томъёотой нийцэж байгаа эсэх	Тийм
4.10.4.хуулийн төслийн зүйл, заалт тухайн хуулийн төсөл болон бусад хуулийн заалттай нийцэж байгаа эсэх	Тийм
4.10.5.хуулийн төслийн зүйл, заалт тухайн хуулийн төслийн болон бусад хуулийн заалттай давхардсан эсэх	Үгүй
4.10.6.хуулийн төслийг хэрэгжүүлэх этгээдийг тодорхой тусгасан эсэх	Тийм
4.10.7.хуулийн төсөлд шаардлагатай зохицуулалтыг орхигдуулсан эсэх	Үгүй
4.10.8.хуулийн төсөлд төрийн байгууллагын гүйцэтгэх чиг үүргийг давхардуулан тусгасан эсэх	Үгүй

4.10.9.төрийн байгууллагын чиг үүргийг төрийн бус байгууллага, мэргэжлийн холбоодоор гүйцэтгүүлэх боломжтой эсэх	Үгүй
4.10.10.татварын хуулиас бусад хуулийн төсөлд албан татвар, төлбөр, хураамж тогтоосон эсэх	Хуулийн төсөлд албан татвар, төлбөр, хураамж тогтоосон асуудал тусгагдаагүй болно.
4.10.11.тухайн хуулийн төсөлд тусгасан тусгай зөвшөөрөлтэй холбоотой зохицуулалтыг Аж ахуйн үйл ажиллагааны тусгай зөвшөөрлийн тухай хуульд тусгасан эсэх	Хуулийн төсөлд аж ахуйн үйл ажиллагааны тусгай зөвшөөрөлтэй холбоотой асуудал тусгагдаагүй болно.
4.10.12.Монгол Улсын Үндсэн хууль болон Монгол Улсын олон улсын гэрээнд заасан хүний эрхийг хязгаарласан зохицуулалт тусгасан эсэх	Үгүй
4.10.13.хуулийн төслийн зүйл, заалт жөндөрийн эрх тэгш байдлыг хангасан эсэх	Хуулийн төсөлд жөндөрийн эрх тэгш байдлын талаарх асуудал тусгагдаагүй болно.
4.10.14.хуулийн төсөлд шударга бус өрсөлдөөнийг бий болгоход чиглэсэн заалт тусгагдсан эсэх	Үгүй
4.10.15.хуулийн төсөлд авлига, хүнд суртлыг бий болгоход чиглэсэн заалт тусгагдсан эсэх	Үгүй
4.10.16.хуулийн төсөлд тусгасан хориглосон хэм хэмжээг зөрчсөн этгээдэд хүлээлгэх хариуцлагын талаар тодорхой тусгасан эсэх	Үгүй

ТАВ. ҮР ДҮНГ ҮНЭЛЖ, ЗӨВЛӨМЖ ӨГСӨН БАЙДАЛ

Хуулийн төслийн үр нөлөөг үнэлэх энэхүү үнэлгээг Хууль зүй, дотоод хэргийн яамнаас боловсруулсан “Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийг соёрхон батлах тухай хуулийн төсөл болон хуулийн төслийн үзэл баримтлалын хүрээнд хийж гүйцэтгэлээ.

Дүгнэлт:

“Цагдаагийн байгууллагын хамтын ажиллагааны тухай Монгол Улс болон Бүгд Найрамдах Чех Улс хоорондын хэлэлцээр”-ийг соёрхон батлах тухай хуулийн төслийг сонгон авсан шалгуур үзүүлэлт тус бүрийн дагуу хийсэн үнэлгээг нэгтгэж, дараах дүгнэлтийг хийлээ. Үүнд:

- Хуулийн төслийн зохицуулалт нь хуулийн төслийг боловсруулах болсон хэрэгцээ шаардлага, үндэслэлүүдтэй нийцэж байгаа бөгөөд хуулийн төслийн үзэл баримтлалд тодорхойлсон зорилго, зорилтыг бүрэн илэрхийлж чадсан эсэхэд, мөн хуулийн төслийн зорилгыг илэрхийлж чадахуйц, бүрэн гүйцэд томъёологдсон эсэхэд үнэлгээ хийж үзэхэд зорилго, зорилтыг хангахад чиглэсэн зохицуулалтууд нь зорилгод хүрэх боломжтой байдлаар томъёологдсон байна.
- Хуулийн төсөл нь Хууль тогтоомжийн тухай хууль болон Хууль тогтоомжийн төсөл боловсруулах аргачлалд заасан шаардлагыг хангасан байна. Тухайлбал, “Зорилгод хүрэх байдал” шалгуур үзүүлэлтийн хүрээнд хуулийн төслийг үнэлж үзэхэд зохион байгуулалттай, тэр дундаа хар тамхи, мансууруулах эм, сэтгэцэд нөлөөт бодисын хууль бус эргэлт, терроризм, түүнийг санхүүжүүлэх, хүн худалдаалахтай холбоотой, мөн цахим орчинд үйлдэгдэж буй хууль бус мөрийтэй тоглоом, залилан мэхлэх зэрэг гэмт хэргийг илрүүлэх, түүнээс урьдчилан сэргийлэх, тэмцэх чиглэлээр талууд шууд харилцах замаар бодитой хамтран ажиллах эрх зүйн зохицуулалтыг тусгаж өгсөн нь энэхүү шаардлагыг хангасан байна.
- “Практикт хэрэгжих боломж” шалгуур үзүүлэлтийн хүрээнд хуулийн төслийг үнэлж үзэхэд талуудын хил дамнасан, зохион байгуулалттай гэмт хэргийг илрүүлэх, түүнээс урьдчилан сэргийлэх, энэ төрлийн гэмт хэрэгтэй тэмцэхэд тодорхой хэмжээнд ахиц гарахад нөлөө үзүүлэхүйц, мөн талуудын нэгдэн орсон бусад олон улсын гэрээ, хэлэлцээрээр хүлээсэн үүрэгт үл харшлах, түүнчлэн хэрэг бүртгэх, мөрдөн байцаах шатанд хоёр улсын эрх бүхий байгууллагууд өөр хоорондоо шууд харилцах боломжтой байхаар хэлэлцээрт тусгаж өгсний зэрэгцээ хуулиар хамгаалагдсан нууц мэдээлэл болон хүний хувийн мэдээллийг хүлээн авах, ашиглах, хадгалах, хамгаалах зэрэгт холбогдох асуудлыг зохицуулахдаа практикт хэрхэн хэрэгжүүлэх арга замыг тодорхойлж өгсөн нь энэхүү шалгуур үзүүлэлтийн шаардлагыг хангасан байна.
- “Ойлгомжтой байдал” шалгуур үзүүлэлтийн хүрээнд хуулийн төслийг үнэлж үзэхэд Хууль тогтоомжийн тухай хуулийн 29 дүгээр зүйлд заасан хууль тогтоомжийн төслийн эх бичвэрийн агуулгад тавих нийтлэг шаардлага, мөн хуулийн 30 дугаар зүйлд заасан хуулийн төслийн хэл зүй, найруулгад тавих нийтлэг шаардлагыг хангасан байна.
- “Харилцан уялдаа” шалгуур үзүүлэлтийн хүрээнд хуулийн төслийг Хууль тогтоомжийн төслийн үр нөлөөг үнэлэх аргачлалд заасан асуултад хариулах байдлаар шалгасан бөгөөд аргачлалд заасан шаардлагыг мөн хангасан болно.

---oOo---